

北海文史

第七辑

筹备合浦县立第五中学校募捐启

吾乡公馆圩，为合浦县东四区之中心。其西四十里至闸口，东六十里迄山口，为省道所经之干线(已完成)，北四十里为新渡，滨廉州江，过江又通省道贯合灵两县之干线，南十里为铁山，则渔盐之所凑集，而濒海矣。往年余有建筑新铁(即新渡通铁山)公路之计划，工既鳩，以款中辍。地区之辽阔，与交通之孔要如此，而居民贫窳悍朴，文风不开，封守如故，余常心焉伤之。溯自清之末叶，罢科举，兴学校，圩之文治书院，首改为文治高等小学，余与范团长德星君，初入学校受业，即自此始，尔来二十有余年矣。至于今，环该圩四区继起之小学，不下十数，而以民贫苦，距县治既远，生活过昂之故，毕业学童，无力升学，计县治省立中学，及北海县立中学两校，为各区人文所聚，而吾东四区之就学于兹者，盖百不一二睹也。各乡儿童以无由上进，放学风更形衰落，是诚大可哀矣!今年夏，范君驻军本土，目睹斯状，慨然邀集昔日同学各姓绅董与彭校长乃程君等，议决请改文治小学校为县立第五中学，就四区增筹校款，以充经常费，再拟扩辟校址，改造旧观，充实校费图籍，重聘良师，革新学制，以备四区小学升校之需求，图挽衰弊锢塞之学风。而经费浩大，地方力穷，无以为应，因为募捐之议，嘱余为之倡。余既旧游之沦寂，子弟之无教，而感范君嘉惠四区宏造青年之伟举也，故乐书该校之关系，及改中之需助如此而为之发导，伏惟吾乡人士，暨四方君子，本同共执之怀，周菽粟水火之急，欣脱手以输囊，庶厚施于里梓，此吾乡之大幸，亦余之荣藉也夫。民国十八年八月日合浦县陈铭枢谨撰启

发起人：张杖新，陈明堂，陈德轩，林国佩，赖德辅，彭雨堂，范德星，李拂尘，陈泰英，沈以甘，陈荔倦，时松年，黄质文，林翼中，廖琴材，陈铭枢，陈玉篔，彭献廷，陈鸿材，陈介卿，廖品佳，叶灌泉，邹道溪，李五云，李耀武，李崇如，赖悦堂，陈镜如，彭少舫，陈雨田，彭珩伯，时楚香，陈光甫，张敬斋。